

Ons het verlede Sondag gesê dat christene verdraagsaam moet wees teenoor ander godsdienste sonder om 'n **verkleurmanneltjie** te wees. Ons het baie keer 'n **probleem** daarmee en daarom wil ek dat ons vandag 'n bietjie langer daarby stilstaan. **Wat bedoel** ons met verdraagsaamheid? Waarom is dit **so belangrik**? Hoe **kom ons daaraan** as ons dit *nie het nie* of *meer* verdraagsaam wil wees?

### **1. ONS HET BAIE KEER 'N PROBLEEM DAARMEE**

Die Franse filosoof **Voltaire** het die stelling gemaak dat van alle godsdienste die Christendom *die meeste verdraagsaamheid behoort te inspireer*, maar tot dusver is die Christene die *mees onverdraagsame* van alle mense. Dink maar aan die **godsdiensoorloë** tussen verskillende Christendenominasies, die Spaanse Inkwisisie, die Kruistogte. Lees die **briewekolomme** en luister na opmerkings tydens **inbelprogramme**.

### **2. VERDRAAGSAAMHEID BETEKEN...**

Die HAT verklaar verdraagsaamheid as: *inskiklik, toegeeflik, geduldig, wat 'n ander se gevoelens eerbiedig*. Dit kan ook beteken *om iets in deernis te verduur*, veral iets waarmee ek nie saamstem nie. Al veskil dit van myne, erken ek ander se reg om 'n **ander standpunt** te hê en hanteer hulle met *liefde en respek*. Iemand beskryf verdraagsaamheid as *"liefdevolle geduld"*.

Dit beteken ook nie op 'n **rugbyveld** dat jy *nie inklimspel* mag lewer nie, maar jy doen dit *binne die reëls*. (oor byt... skeidsregter duik - gevolge dra)

### **3. STEL ONS VOOR 'N GROOT UITDAGING**

Ons staan daagliks voor 'n groot uitdaging wat dit betref. Ons is nie almal **eenders nie**, allesbehalwe! Ons het 11 amptelike *tale* in die land, verskillende *rasse en kulture*. Voeg daarby die verskillende *ouderdomme* en *geslagte*; verskille in *inkomste* en *uitkyk*. Ons staan nie verniet bekend as 'n **reënboognasie** nie! Soms is ons nog haastig ook, of gespanne, of moeg, of in kompetisie gewikkel. Daarom het ek **simpatie met rugbyspelers** tydens 'n wedstryd, want hulle is al vier tergelyk: haastig, moeg, gespanne EN in kompetisie! (En dan moedig die minister hulle ook nog aan tot geweld...)

Ook in die **kerk** is daar verskillende *voorkeure en smake*:

Party hou van die een *predikant* en ander van die ander; party hou van hierdie *liedere* en ander van daardie. Daar is verskillende *spiritualiteite, verwagtinge, oortuigings en tradisies*. Ons skree nie almal vir dieselfde *span* nie! (hopelik almal vir Springbokke!)

As ons **Jesus se voorbeeld** in ag neem, word dit van ons as Sy volgelinge verwag om verdraagsaam te wees ook teenoor hulle wat ons as *dom, nie so cool nie, irriterend, onopgevoed, verspot, swak gedissiplineerd, verwaand of onbelangrik* beskou.

### **4. GOD VERWAG DIT**

Die Bybel lê klem op ons **roeping** tot verdraagsaamheid (LEES T/V). In Kol 3 staan daar vanaf vers 12: *“Julle is die uitverkore volk van God wat Hy baie lief het. Daarom moet julle meelewend, goedgesind, nederig, sagmoedig en verdraagsaam wees. Wees geduldig met mekaar en vergewe mekaar as die een iets teen die ander het.”*

## 5. NIE SO MAKLIK

Dit is natuurlik glad nie so maklik nie. Ons **eerste reaksie** lê meer op die vlak van *“’n oog vir ’n oog en ’n tand vir ’n tand”* nie waar nie. Dit kom meer natuurlik as om jou **ander wang** te draai! Soos ek iemand al hoor sê het: *“Jy moenie terugslaan nie, dis baie verkeerd – slaan eerste!”*

**Jona** was seker die mees onverdraagsame profeet van wie ons in die Bybel lees. Hy was bitterlik ongelukkig daarvoor dat God verdraagsaam was teenoor die heidense stad Nineve. Hy sou eerder wou gesien het dat hulle vergaan vanweë hulle sonde as dat God hulle na hul bekering vergewe en gespaar het. So sal ons ook miskien liever bid dat die moordenaar en verkrachter en bedrieër **hel toe** gaan, eerder as dat hy tot bekering kom en gered word.

**Ander hedendaagse voorbeelde** van onverdraagsaamheid is *padwoede, gesinsgeweld, rusies in gemeentes* bv oor Belhar en sang en taal en styl, *Xenofobie en homofobie*, geweld op en langs die rugbyveld en sokkerveld. Soms wil dit voorkom asof daar ‘n **groeïende onverdraagsaamheid** tussen rasse is. Baie **huwelike** ly agv die onverdraagsaamheid van een of albei partye.

Hoe hanteer jy jou **eggenoot** se tekortkominge, die **bejaarde** wat nie meer so *flink* kan dink en praat en beweeg nie, die **kleutertjie** in sy eie droomwêreld, jou **huishulp** se onvermoë?

**Ps 133:** *“Hoe goed, hoe mooi is dit as broers eensgesind saam woon! Dit is soos reukolie wat van die kop af in die baard afloop, die baard van Aaron, af tot by die soom van sy klere. Dit is soos die dou van die Hermonberg wat op die berge by Sion val. Waar broers so saamwoon, skenk die Here sy seën...”*

## 6. WAAROM BELANGRIK?

Verdraagsaamheid **bring seën!** Dit **voorkom** nie net baie hartseer en verdriet nie, maar **help** ook dat daar *eenheid en harmonie* is en dit maak *samewerking* net soveel lekkerder en soveel vrugbaarder. In ‘n diverse **samelewing** soos Suid-Afrika met sy groot verskeidenheid kulture en godsdienste, is verdraagsaamheid **onontbeerlik** – nie net met die oog op *oorlewing* nie, maar ook met die oog op *nasiebou, eenheid en stabiliteit*.

**Waar** sou ons vandag gewees het as dit nie vir **God se verdraagsaamheid** was nie? Paulus skryf in **Romeine 2:** *“God is ryk in goedheid, verdraagsaamheid en geduld!”* (:4) **Adam en Eva** is wel uit die paradys verban, maar God het aan hulle nog ‘n kans gegee. Die mensdom het in die vloed omgekom, maar deur **Noag** het God ‘n nuwe begin gemaak. Die volk **Israel** stel Hom hoeveel maal teleur, maar soos wat in **Neh 9** staan, *“U het hulle nie heeltemal uitgewis nie”* (:31) Ons onthou seker hoedat **Abr** as’t

ware by God “gebie” het om Sodom te spaar – as daar net 50 ... 45 ... 40 ... 30 ...20 ... 10 regverdiges gevind kon word en hoe verdraagsaam God teenoor hom was (Gen 18). **Die kruis** waaraan sy Seun gesterf het, is vir ons die simbool van sy verdraagsaamheid. **Jesus se optrede** teenoor die armes, melaatses, tollenaars, Samaritane, sondaars, vroue en kinders wat baie stief en onverdraagsaam behandel is in sy tyd, is ‘n toonbeeld van verdraagsaamheid.

As **beeldraers** van God, as Sy vertteenwoordigers en dissipels van Jesus, MOET ons dus ook verdraagsaam wees.

### **7. HOE SAL ONS DIT KAN REGKRY?**

Verdraagsaamheid is **liefde-in-aksie**. Daarom sê 1 Kor 13 dat “Die liefde verdra alles...” Paulus: “Die hele wet word in hierdie gebod saamgevat: “Jy moet jou naaste liefhê soos jouself.” Maar julle byt en verskeur mekaar; pas op dat julle mekaar nie later heeltemal verslind nie.” ( Gal 5 :14,15). Onverdraagsaamheid gaan **van kwaad tot erger**. Dink maar aan die gebeure vandag 10 jr gelede met die aanval op die **Twin Towers**) Liefde is ‘n **vrug van die Gees**. Ons moet dus **bid** vir meer liefde en **gehoorsaam** aan die Gees lewe en dan sal ons ook meer verdraagsaam wees. Wanneer jy en ek ons in die **posisie van die ander** plaas, sal ons die persoon se optrede dalk kan verstaan.

Verdraagsaamheid word in ons **teksvers** in dieselfde asem met **beskeidenheid** en **geduld** genoem. Hoeveel onverdraagsaamheid is nie die gevolg van **hoogmoed** en van **ongeduld** nie?

Onverdraagsaamheid is baie keer ‘n geval van **selfsug**: ek wil hê ander moet *maak* soos ek maak, *dink* soos wat ek dink, *hou* van wat ek hou, my MY sin gee. Dit gaan **om Ek** met ‘n hoofletter.

Jesus het verkondig dat **dissipelskap** vra dat ek my self verloën.

### **8. HOE LEER ONS DIT VIR ANDER?**

Hoe leer ons ons kinders om verdraagsaam te wees?

(Toerustingsondag) **Albert Schweitzer** het dit duidelik gestel:

*“Kinders leer op drie maniere – voorbeeld, voorbeeld, voorbeeld.”*

### **9. DAAR IS GRENSE**

Ons kan nie afsluit sonder om mekaar ook daaraan te herinner dat daar **ook grense** is vir verdraagsaamheid.

James Goldsmith: *“Tolerance is a tremendous virtue, but the immediate neighbours of tolerance are apathy and weakness.”* Ons mag nie verdraagsaamheid gebruik as **verskoning vir**

**lafhartigheid** nie.

Die Boodskap-vertaling van 1 Kor 13 vat die beginsel van verdraagsaamheid so saam: *“Maar liefde het ook grense: liefde kan nooit kant kies vir dinge wat verkeerd is nie. Net so sal liefde net bly wees oor dit wat regtig gebeur soos God dit bedoel het.”*

Daar is dinge wat geen goeie Christen, trouens geen mens **moet verdra nie!** Dinge soos *misdaad, korrupsie, onbeskoftheid* bv. In sulke gevalle moet die ander **gekonfronteer** word en indien dit nie help nie, moet verdere stappe langs die regte kanale oorweeg word. So verdraagsaam soos wat **die HJ** teenoor *mense* was, so

onverdraagsaam was Hy teenoor die *sonde*. **Die kruis** is die simbool van God se verdraagsaamheid teenoor die sondaar, maar ook van Sy onverdraagsaamheid teenoor sonde. Op die Oordeelsdag sal God 'n streep trek: Tot hiertoe en nie verder nie.

**SAMEVATTING**

Op 16 November is dit **Internasionale Dag van Verdraagsaamheid**. 1995 was die **Jaar van Verdraagsaamheid**. Kom ons maak van **ELKE dag** 'n "dag van verdraagsaamheid"!

Amen

11 Sept 2011